

## IKINYARWANDA

**Itariki : 28/06/2022**  
**Isaha : saa munani-saa kumi**  
**(14h00-16h00)**



## IBIZAMINI BISOZA IGIHEMBWE CYA 3

**IKICIRO:** **AMASHURI ABANZA**  
**UMWAKA WA:** **5**

**IGIHE KIMARA:** **Amasaha 2**

**AMANOTA:** ..... /50

### AMABWIRIZA

1. Ntufungure iyi kayi y'ibibazo by'ikizamini utabiherewe uburenganzira.
2. Ikizamini kigizwe n'ibibazo cumi na bitanu (15). Mbere yo gutangira banza ugenzure niba ibyo bibazo byuzuye n'amapaji yose yuzuye.
3. Ikizamini kigizwe n'ibice bine:
  - Igice cya mbere: Kumva no gusesengura umwandiko (amanota 15)
  - Igice cya kabiri: Ikibonezamvugo (amanota 10)
  - Igice cya gatatu: Ubumenyi rusange bw'ururimi (amanota 15)
  - Igice cya kane: Ihangamwandiko (amanota 10)
4. Ibisubizo bigomba kuba bifututse kandi byuzuye.
5. Gusiribanga no guhindagura ibisubizo bifatwa nko gukopera.
6. Subiriza mu mwanya wagenwe.
7. Koresha gusa ikaramu y'ubururu cyangwa iy'umukara.

## **UBURENGANZIRA BW'ABANYANTEGE NKE**

Muhirwa yari afite umugore witwa Mukandori n'abana batanu ndetse agomba no kwita kuri nyina wari mu za bukuru. Umuryango wa Muhirwa wari ukennye, ku buryo abana be batashoboraga kwiga ngo barangize amashuri. Mu rugo bari batunzwe no guca inshuro kugira ngo babone ikibatunga. Babagaho mu buzima bugoranye. Muhirwa yari umugabo w'ibigango, ushoboye gukora ariko kubera umuryango munini yari afite, kandi nta sambu cyangwa amatungo yari afite, utwo akoreye twose tugasa nk'igitonyanga mu nyanja.

Umunsi umwe haza gutera intambara. Iyo ntambara yasanze umugore we atwite kandi afite n'abana babiri bakiri inshuke mu gihe Muhirwa atari imuhira kuko yari yaragiye gupagasa ngo abone icyatunga umuryango we.

Intambara yatumye umuryango wa Muhirwa uhunga nta bikoresho by'ibanze ujyanye. Dore nawe, umugore we Mukandori yari afite inda y'imvutsi, afite inshuke ebyiri ndetse agomba no gusindagiza nyirabukwe. Mukandori yeguye utwenda, afata udushyimbo n'utundi twaka bari basigaranye akorera abana be bakuru maze na we arabashorera baragenda. Yagombaga kugendera magufi nyirabukwe nubwo na we atari yorohewe. Kubera ikivunge k'impunzi, Mukandori yaje kuburana n'abana be babiri bakuru. Bari nko mu kigero k'imyaka cumi n'itanu na cumi n'itatu. Aba bana ni bo bari bashoboye kugira ibyo bikorera byo kurya. Iyi mibereho yo guhangayika n'intege nke z'urugendo byatumye Mukandori akuramo inda. Ubwo nyirabukwe na we utari ufite uko yimereye ni we wasigaye ahubwo agomba kwita ku mukazana we dore ko nta kanunu k'abuzukuru bari baburanye bari bafite. Iyo ataza kugira abaturanyi ngo bamujyane ku ivuriro ryari hafi y'aho bari bahungiye na we ntiyari kubaho.

Ku ivuriro bitaye kuri Mukandori baramuvura arakira ndetse kubera ko hari n'ikigo nderabuzima, ba bana b'inshuke na nyirakuru wabo babitaho kugira ngo bashobore kurokora ubuzima bwabo. Umugore wa Muhirwa, Mukandori yamaze ukwezi kose mu bitaro kuko yari yarazahaye mbere yo koroherwa agasanga abandi aho bari barahungiye. Impunzi zari zarashyizwe mu nkambi zitandukanye, maze imiryango y'abagiraneza itangira kwita no guhuza imiryango yatatanze.

Inkuru y'uko Mukandori yari ari mu bitaro ntabwo Muhirwa yayimenye. Ahubwo yakomeje kurorongotana ashakisha hirya no hino aho umugore we yahungiyeye. Nuko ku bw'amahirwe aza guhura n'abana be bakuru bari baraburanye na nyina. Muhirwa yaribwiraga ati: "Ubu umugore wange ibye byararangiyeye. Abana bange bato na mama na bo ibyabo byararangiyeye." Muhirwa yumvaga yishinja kuba atarakoze ibyo yagombaga gukora. Nuko akibwira ati: "Ubundi iyo ntaza gusiga umugore wange wari hafi kubyara, ubu nta cyo aba yarabaye." Kubera ibibazo yibazaga, Muhirwa yari amaze gutakaza ibiro byinshi. Yirirwaga abaririza niba ntawuzi uko byagendekeye umugore we, abana be ndetse na nyina, akabura uwamuha amakuru y'imvaho.

Nyuma y'amezi abiri Muhirwa ashakisha hirya no hino yaje kugera ku kigo nderabuzima cyari mu nkambi yitaruye iyo yabagamo, ashakisha abana be bato. Nuko aza kumva umwana amuhamagara ngo: "Papa!" Yumva arikanze, arakebaguza agira ngo hari undi uwo mwana ahamagara. Arebye hafi ye abura umuntu. Ni bwo yabonye akana ke k'agakobwa kiruka kamusanga. Nuko n'ubwuzu bwinshi aragaterura. Arakabaza ati: "Hano wahageze ute? Abandi se bari he"? Umwana ataramusubiza aba abonye Mukandori ari kumwe na nyina basohoka mu kigo nderabuzima bafite ibikapu byarimo ibiribwa bari bavuye gufata ku kigo nderabuzima. Nuko barahoberana, barishima. Muhirwa ashimishwa no kongera kubona umuryango we, bajya kumwereka icumbi barimo. Muhirwa ntabwo yicaye ahubwo yaravuze ati: "Ubu ngiye kuzana abana bakuru twabanaga tuze twegere iki kigo nderabuzima gifasha abanyanteye nke."

### **IGICE CYA MBERE: KUMVA NO GUSESENGURA UMWANDIKO (amanota 15)**

1) Muri uyu mwandiko haravugwamo ba nde? **(amanota 2)**

.....  
 .....

2) Uyu muryango wari ubayeho ute? Kubera iki? **(amanota 2)**

.....  
 .....  
 .....

3) Kuki uyu muryango watatanye? **(amanota 2)**

.....  
.....

4) Bageze mu nzira uyu muryango byawugendekeye bite? **(amanota 3)**

.....  
.....  
.....

5) Uyu mwandiko urangira ute? **(inota 1)**

.....

6) Sobanura amagambo akurikira dusanga mu mwandiko: **(amanota 5)**

(a) Ibigango: .....

(b) Igitonyanga mu nyanja : .....

(c) Inshuke: .....

(d) Ikivunge: .....

(e) Kurorongotana:.....

.....

**IGICE CYA KABIRI: IKIBONEZAMVUGO (amanota 10)**

7) Hindura indango z'inshinga zo muri izi nteruro: **(amanota 2)**

(a) Si byiza kudaha umwana umugabane ku mutungo w'ababyeyi be.

.....

(b) Ndaza mu gitondo. ....

8) Hindura ingiro z'inshinga muri izi nteruro : **(amanota 2)**

(a) Amazi yanduzwa n'imyanda yo mu nganda.

.....

(b) U Rwanda rufite inzuzi n'imigezi byinshi.

.....

9) Vuga ubwoko bw'amagambo atsindagiye. **(amanota 4)**

(a) Karisa yakosheje se amukubita **inkoni** ngo: **"Paa!"**

**inkoni** : .....

**paaa** : .....

(b) Mwa bana mwe, **umukuru** muri mwe naze mutume.

**umukuru:** .....

(c) Twirinde abadushora mu mibonano **mpuzabitsina**.

**mpuzabitsina:** .....

10) Erekena uturemajambo n'amategako y'igenamajwi by'amagambo  
atsindagiye : **(amanota 2)**

Hari **abana** bafite **imyaka** itabemerera gukora akazi gahemberwa.

**abana :**.....

**imyaka:** .....

**IGICE CYA GATATU: UBUMENYI RUSANGE BW'URURIMI (amanota 15)**

11) Simbuza amagambo atsindagiye andi yabugenewe : **(amanota 6)**

(a) Shaka **ibyatsi bahanaguza inka uzihanagure**.

.....

(b) Nabonye nka ifite **utubere tudakamwa**.

.....

(c) Bwira uwo mwana age guca **isaso y'inka**.

.....

(d) Genda **umanike** kiriya gisabo.

.....

(e) Twabuze amata kuko inka yayaduhaga **yarekeye aho gukamwa**.

.....

12) Kosora amakosa y'imyandikire ari muri iyi nteruro: **(amanota 3)**

Nuva kw'ishuri uge kuhira za ngemwe zibiti twateye ejo bundi.

.....

.....

13) Erekena ibintu bibiri biranga inkuru ishushanyije. **(amanota 2)**

.....

.....

14) Tahura muri iki kinyatuzu amagambo ane yerekeranye n'ishuri. **(amanota 4)**

|   |   |   |   |   |   |
|---|---|---|---|---|---|
| I | S | O | M | O | I |
| G | I | W | V | I | N |
| I | S | H | U | R | G |
| H | A | O | P | A | W |
| E | H | B | Y | T | A |
| N | A | E | M | I | S |
| I | K | A | Y | I | G |

|       |
|-------|
| ..... |
| ..... |
| ..... |
| ..... |

**IGICE CYA KANE: IHANGAMWANDIKO (amanota 10)**

15) Andikira inshuti yawe uyibwira umwandiko wagushimishije mu gitabo cy'umwaka wa gatanu w'amashuri abanza n'impamvu cyagushimishije. Urangize umugira inama yo gukunda gusoma unamwumvisha akamaro kabyo. **(amanota 10)**

[illegible]**HEREZO**